



袁文榮公文集卷之五

○贈施南渚令吉水序

南渚子惠而文摅而斷直廉而有容未第  
時人固以國器重之暨嘉靖戊戌登進士  
甚允時望秋八月天曹掄良有司以父母  
元元南渚子以資望出令於江右之吉水  
將蒞官辭其鄉老先生太宰甬川翁而請  
教焉甬翁曰以子之才出宰吉民恢恢乎  
裕如矣予何言哉然而樹德布憲飭紀陳  
風在令弗可隳焉是故課農織以蕃其生



則民不匱鼓庠序以章其化則民不淫敦  
禮讓以振其風則民不犯孚忠信以聯其  
志則民不攜兼此四物而豈弟周渥威明  
茂宣則政有思而無斃吉之民其胥匡以  
生乎無亦于茲焉罔弛也繼而詣大廷尉  
東洲翁而請益焉東洲翁曰太宰之所以  
迪子者至矣予又何言哉然嘗聞之恒賦  
寬力民生乃殖軌物成身民化乃淳彰善  
瘳惡風斯可作者誠去僞志斯可萃是故  
弘道斐民起衰恊極以嘉古循良之休風

於吾子有厚覬焉南渚子受二翁之不訓  
出以語同年袁氏史袁氏史曰吾于是而  
知子之敷政必不灑也又于是而知子之  
晉陟必不次也古稱詢茲黃髮則罔所愆  
二翁昭代之元老後學之稽疑其於士道  
之謨忱足以進隆古階來禩而吾子奉以  
周旋敏達濟焉勤慎將焉則鴻猷顯融周  
澤汪穢庶績用凝齊民從義將謳之曰是  
今之召杜也政之所敷曷其有灑哉自茲  
而監司楊其烈臺諫䟽其芳勤璽書之褒

光御屏之紀將甄拔於不常之調以勵有位矣階之晉陟奚埃於次哉惟吾子毋忘厥規也南渚子曰始聞二翁之教心說以解矣得吾子之言乃益明著昔人有書紳以志不忘者子盍爲我述之以寓官箴焉表子于是爲之次其詳而贈之

○送陳懷椿還雪川敘

雪川陳君景清蚤失怙終身慕不置故以懷椿自謂人遂輒稱君懷椿子云懷椿子自雪川走京師介予宗叔靚淵子而造焉

余以客禮優之既諦察其爲人迢迢然有篤行君子之風然懷椿子之來寔以孫隸國子藉是時會

天子方誅逐北虜大司農奏經用竭不足以奉戰士乃令民得入貲拜爵佐軍興懷椿子善居積饒於財生平競競慎施舍弗敢妄獨好賑貧乏無恡色既躬睹國家之急義不容董董焉自珍視其囊有羨金遂委輸於大司農例當授引禮舍人寔益藩焉然懷椿子以素封立名心不樂仕進乃竟提

空秩而歸靚淵子謂予曰懷椿子而雖傾  
蓋交然其人行義足與也乃今持武功爵  
飄飄乎歸遨遊於茗誓之間其儻然修德  
遠矣庸可不概於文辭以表見其風格耶  
余嘗讀太史公貨殖傳其言曰賢人深謀  
于廊廟論議朝廷守信樹節隱居巖穴之  
士設爲名高者安歸於富厚也愉乎若懷  
春子者可不謂富好行其德而名高者哉  
夫恒人之情苟有所捐舍將必希覬徼攫  
以求當乎其初故沉鈎餌於九淵之深者

志鮮割之

珍馳彈光於層雲之表者意飛

蟲之獲不然此有智盡能索耳終不餘力  
而捨丸餌矣今懷椿子以其貲佐國匱而  
歆羨取償之私不少悉慙於裏願徒擁王  
官之御以適其巖處竒士之行其視漢卜  
太傅後先矛盾可等均語耶予又聞之財  
積而不能散與散材而壑委焉即埒富王  
侯仁義弗之附矣懷椿子時用知物似若  
屯其膏而不輕所施者然觀變掣發厥植  
立徃徃竒偉倣儻要岳諸不朽云靚淵子

者又稱其好捐金葺扛梁邑人無或褻裳  
病涉者學宮圯幾無以奠聖靈宣文教乃  
倡率而構新之邑之博士諸生藉以雍容  
脩經藝焉夫拯途人之阽飭先師之祠賢  
豪長者事也推其爲即蒞民恢政亦其所  
優裕而懷椿子獨卷藏而用之家此豈可  
以庸蹟恒執觀之哉白圭有言智不足與  
權變勇不足以決斷仁不能以取強不能  
有所守雖欲學吾術終不告之矣余于懷  
椿子亦云

○護堦蘭茁詩序

敘曰夫仁人君子之仕也展采宣力楨國  
膏民日鯁鯁焉皆窳之省憂此豈有利獲  
希覬念哉然躡德而履應乃道化自然之  
符外焉顯被寵榮日昭登其名位內焉召  
致休和而禔福其身家即欲灑然遜辭之  
弗克也故詩稱之屏之翰百辟爲憲不戢  
不難受福不邪蓋自昔詠之矣余嘗述稽  
邇率德人之履茲者未遑悉論着乃今郡  
守槐溪孫公所乘遇則爲余躬睹記之且

諒徵應之不爽焉公以戊戌進士歷任秋  
官尚書卽出守余明五載矣清操異政偉  
節通才旣已飛照臺剡紀注

御屏而怙悞保釐滅恩深澤又淪浹周渥郡士  
民童白靡不謳吟歌誦於不匱頃年蕃釐  
構禍海波震揚公悉心籌弭郡以寧謐厥  
公之樹尤在疆場矣余聞郡諸縉紳耆碩  
曰公廉潔無私似楊伯起之守弘農寬和  
敷治似黃霸之守潁川吏畏民懷似朱季  
之守南陽捍防海夷似龔遂之守渤海嘻其真

知言哉公之來守吾郡奉母太夫人之色  
養焉太夫人春秋逾七秩矣而公之年亦  
強仕外未舉子太夫人日抱蘭王之憂乃  
壬子冬月公始得冢嗣於郡齋茲非履應  
歟祺之兆耶余邑中人士相與謀曰槐溪  
公澍濡吾慈澤厚矣欲報之德罔圖也肆  
公有嘉慶寓言以酬一二可乎於是各爲  
詩哥謔詠之已乃繪圖萃冊命之云萱堦  
蘭茁而遂屬敘於予予受而欽然嘆曰風  
颯乎諸君子之賦有味哉其名之也余聞

仁人孝子之欣戚匪親不形槐溪公之有  
子太夫人之心騅馬滋洽也茲冊之名不  
有以抒公之驩悰耶余讀崔豹古今注曰  
欲蠲人之憂則贈以丹棘按丹棘者護也  
一名忘憂又名宜男夫槐溪公撫鞠吾明  
民皆瞻依孔邇抃樂胥匡海邦怙公以無  
憂矣公外勤民隱入起居太夫人晨夕慈  
顏衍衍春盎北堂公方觴綵怡愉幸茲愛  
日寧復有憂之足愁耶然弧星秘彩熊瑞  
未徵太夫人寔缺昌後之望而公之情亦  
或憐憐焉靡紓也顧今宜男協吉蘭孫擢  
穎太夫人之憂蠲矣公上康壽母下撫竒  
胤將熙然順親之境而郡人荷忘憂之澤  
亦罔不懽暢奔趨樂公光裕之慶農壤於  
郊商謳於市士大夫頌於堂冲和蒸鬱靈  
護永年庭堦蘭玉將彙植交芬於無紀矣  
斯非諸君子名冊之同忱耶若公之晉陟  
鼎鈞建榮恢號則鴻藻鉅公當載諸蘭石  
炳如也茲固未及論焉

○五雲春壽圖序

予叔南泉君倅維揚之泰州甫數月能聲  
殷殷起監司器其廉平無害乃令君部江  
淮商稅萬餘緡入大司農以佐軍興君詣  
大司農爲癸亥嘉平月越甲子孟春公無  
逋貲官無滯牒將返於泰以春三月念有  
七日五十初度予宗親客都門者若干人  
相率告予曰君屆誕當在官舍吾輩越處  
此欲舉觴爲君壽無從也及今聚首長安  
邸盍預爲文以壽君即勿能周旋君阼階  
之側而吾輩可藉手致祝悰也因繪圖以

贈而問意於余余惟壽君於

帝鄉地勝而會嘉亦人生所稀違也乃題  
曰五雲春壽圖而因系之以言予聞之聖  
人在上道化而穆太和充盈於宇宙時則  
雲呈五色以昭至治之符故景雲著於軒  
圖赤雲紀於堯牒慶雲賡於舜歌彰彰可  
徵覩已乃予遭際

聖明得從龍翼鳳於霄漢而君亦沾一命之寵  
從

王事以奔走於斯聚族於斯又稱壽於斯相與

登雲臺而望氣每見夫青雲之興則徵國  
之多賢焉黃雲之覆則占歲之屢豐焉輪  
囷紛郁而爲卿爲喬則又慶太平之有象  
焉其爲燕喜豈徒誇東海之籌侈南山之  
頌已哉予又聞之雲之爲物也聚散靡定  
迺今對雲圖酌春酒歡洽於一堂之上則  
固飄然滃然如雲之聚矣茲君携盃而往  
宦遊江雲之鄉時一展而觀之神京貝闕  
上林琪樹接於目而感於心則想見帝鄉  
之會若參若倚是予輩與君跡雖散猶夫  
聚之樂也予固有白雲之思而方負霖雨  
天下之責君又駸駸然向用雲蒸未艾銓  
部程賢敘績擢遷近署將復乘風挾盃而  
來則他日之聚又當忘今日之散矣於是  
諸宗親咸曰深哉達人之論也遂書於盃  
之左

○壽大京兆毅庵孫公八袞序

嘉靖戊申蕤賓月之某日爲毅庵孫公初  
度之辰茲秩蓋八十云同邑縉紳先生相  
與走幣持卮酒爲公壽余時以奉使河洛

取道歸覲省獲從諸先生後乃諸先生謂  
余宜有言以詡揚公隆羨用登祝元禔於  
無紀余惟公踔踔樹高操危言剴論著譽  
諤不可撓之節其聲稱藉甚在瓌垣廻翔  
中外擻茂發榮乃所蒞類宣護其經綸而  
勛猷政業曄曄然光應藩臬振寓內既晉  
陟頡顛尹茲留都厥所指尤瑰卓群望而  
赫熙允若不啻比才與趙張二王馬已夫  
公歷事兩朝列爲九卿蓋然鼎臣之漸  
其所以孳濟天下葆禧朝野者恢乎其有  
矣俾公悉沛其所施庸不匡培仁壽引翼  
穆清之元化耶顧公乞身解綬竟遂初於  
赤水之濱而閔稗淵積方雍容珍闕以獨  
遊其玄然則公之履祺襲吉而翛然儷休  
於至人者不可以徵睹其概哉頃余於暮  
春之良偕通叅甬江君振衣寶峰之巘乃  
周覽山川察風氣融結以審機祥之宜因  
僂指鄉先生所居而教菴公之第實巋然  
於邑治西南余諦觀之乃見清醇酥醉之  
氣葱蘢瀟滄油油乎翥浮於其第未幾復

有青雲緝如來自天際而飄飄渟洄粹若  
翠蓋適集於公居第之上余指謂通叅君  
曰此何祥也君曰此毅菴公德壽之徵也  
夫耆英名碩其出處洩天地之秘萃海岳  
之靈故二五間氣必與之俱以茲夏屆八  
秩弧辰且密邇矣壽考之精彪發融朗是  
氣非其所嚮暉耶雲物志有之賢人之居  
必有青雲覆其上公清德竒節屹屹然爲  
昭代名賢乃今蟬蛻朱組逍遙綠野其杖  
履遊息之所將烟霞護之青雲集之儻非  
此之謂乎余聞而灑然曰始吾觀祥異及  
五行諸志其稱說天人之際哲矣然大都  
宇宙間熙淑之氣純明之祐徃徃爲德人  
所承藉此皆章然較著可稽列也今於毅  
菴公之所逅與甬江君之言乃尤忱諒云  
於是封御史介所劉翁謂余言不詭  
於恒理可采命序次以壽公若公德福之  
勩祚胤之昌則慈之人皆知之皆能言之  
以故余不著焉

○壽南山吳封君九十序

人有言曰世謝元樸人闕大年余竊嘗疑  
之及今觀巖棲耆德之英往往蹈祺履應  
軒然登上壽焉余然後知天道獨厚生人  
有高世之福曩所聞豈不淺鮮哉余未遑  
遍述所睹記而同年比部郎吳君維嶽則  
爲余道其大父南山翁云翁務竒偉俶儻  
顧懷玉潔修隱吳雪溪山間乃以所操挾  
者用之家家日就饒益翁嘗言曰嗟乎丈  
夫生世豈使獨珍閔哉吾以抱朴明農罔  
適當世用盍亦以其事責諸兒輩乎乃訓

兩子修經術而伯氏允祥仲氏允際皆蜚  
英藝林同擢丙戌進士第允祥由侍御史  
歷憲副允際以司功郎中遷叅政而維嶽  
則與余舉戊戌進士爲今官餘諸孫咸斌  
斌文學陟顯融者未艾傳稱明德者不當  
世其後必生達人儻非翁埒休耶歲庚戌  
維嶽謂予曰吾大父以蜡月某日躋九袞  
壽尚矣幸子文之俾嶽藉手稱壽觴乎余  
拜首曰君之祖乃獨擅殊祉陟元齡至此  
哉以余覽觀之雖翁含德茂致然也蓋亦

繇山川之助焉翁世家金曜王華山麓溪  
谷縈帶奇秀相錯而兩山蓋宗天目云天  
目爲西浙之鎮道經所謂三十四洞天是  
元淑之所鍾而仙靈之都也夫名山流蘇  
發祥網緼漉瀆究其所淳湑必麗諸人不  
他集焉然其清明閎博之器人得之則擲  
爲文章發於事業詡揚於功名而元夫鼎  
臣所著廊廟紀蘭石者皆茲氣所表見也  
若其氣之堅凝淳穆者則淵懿隱君子承  
之乃福履康豫壽考引長慶積澤流褻然

歛區宇之純嘏而世之葆光山澤比迹列  
仙者謂非是氣所融結耶今觀允祥伯仲  
父子振采策奇樹立閎麗將與古之王寶  
氏比隆而翁之祿壽方履端綿歷升恒未  
窮余所稱名山之氣可不謂兼蓄無遺缺  
哉昔詩人頌禱求年大都以如山若岡陵  
爲詞夫山靜而貞與天壤無極壽同之可  
徵久矣余故因比部君之請稱名山之妙  
用以祝翁云翁以允祥貴封監察御史再  
以允際貴封考功卽中後先領兩子封亦

世所希絕遇也併論著之

○賀靜窓錢公七十序

玄覽超方之士未有不思合乎天人者也夫其種仁義矣又能託無窮之詞以自著矣顧其心恒痺然卑之不爲意乃徃徃事冲舉恣凌厲操逍遙於所謂方丈壺梁太液壁門莖臺文昌三神仙恠偉之論莫不甘心焉雖耳目所不經而騷論較若平生可以緣迹而偵遇之也何耶明千里之故則輕百里其超委然矣余邑靜窓錢翁少

學聖人之道博綜群籍盡通墳典丘索子史之言發爲文辭遂以文雄越中嘉靖己丑舉進士高等解褐授南昌郡推擢留垣給事中出補袁州郡守徊翔敷歷樹勛施聲濯濯乎蜚照乎海宇矣既倦游脫組歸卧甬東慈水上杜門獨貴取岐黃素問諸書及越人蒼公等精良禁方觀之探隱抉微鈎閘淵秘談諸疾病鮮不中鄉人士以翁遠識可方唐陸宣公云然翁每謂醫之技止却疾輔生非度世長年術意嘗董董

焉隘視之。而得雲笈龍嶠異書並綿袞  
鴻寶苑登真指元諸仙記。昕夕俛仰讀之。  
悉解其洞虛靈妙之微。導養還丹之訣。飄  
飄然有凌雲之氣。復嘖然抵掌言曰。吾久  
困跡於滋垢中。今而後始獲蟬蛻於蟬埃  
外矣。遂築別室於東山之麓。修其鍊丹庶  
幾。王伯僑安期生。羨門之爲僊也。然縉紳  
鄉先生相與非笑之。且頌言曰。世言方仙  
家。意多竊天地秘氣。期形解難化也。彼謂  
致丹砂成黃金。盡虛語哉。錢翁驚其心於

忽荒罔象之表。何爲余聞而疑焉。既復湛  
穆而思焉。夫靜窓翁邑中稱先達人。有道  
術者。厥指嚮豈詭誕若所聞耶。昔劉子政  
列仙傳載赤松至玄俗七十人。而阮蒼仙  
面撰貌七伯餘人。此兩人者。非誦說先王  
以儒人名耶。邃古神仙踪跡矣。未可徵述  
國初周顛仙張三丰之流。殷勞

萬乘勤王帛。發使者訪之。此近代事。豈不足睹  
信耶。蓋余嘗有臆言曰。聖人之道與仙人  
之術。出入變化於霄壤間。以翔舞賢豪於

不倦也聖人以道長生陳萬象而顯於有  
仙人以神長生妙萬象而入於無兩者交  
相寂感異用而同原靜窓翁提民翼化既  
已出聖人之緒餘矣茲卷精萃而握諸身  
儻所云仙人不瘁亭毒不毀者非乎翁今  
年七十矣飄髯黃髮顏色猶童會客飲即  
夜分忘倦奕竟日欣欣然樂也遠視高步  
行若少年見之者以爲翁有所得非恆人  
矣翁以癸丑冬仲月初度鄉人士徵余文  
壽翁余時尋仙齊雲山不果文明年甲寅

初度始著論爲翁壽云

○賀閭侍御母王太孺人壽序

待御閭啓明舉甲辰進士授汝之新蔡令  
啓明令新蔡有異政河洛諸令長皆後啓  
明莫之先歲戊申以治行高第徵入爲侍  
御史啓明居臺中未滿歲卽聲華殷殷有  
峻望始余校士南省得啓明文讀之竒古  
踈宕知其爲淵濬士云他日授之政當必  
遐舉崇樹瑰然策勛名於 昭代也乃今  
觀其所兆行此不可以概見其終耶已酉

秋八月啓明膺簡命出按其肅肅於蜀  
爲接壤啓明以故得取道歸蜀覲省其母  
王太孺人於堂先是啓明持新蔡三載績  
入報司功司功乃詔於司封而明與焉於  
是啓明獲贈父竹坡翁爲文林郎封母王  
爲太孺人太孺人今年六十三壽矣夏五  
月初度啓明瞻雲悵不自勝乃茲捧  
綸音繡衣躬拜舞堂下稱觴爲太孺人壽  
古所謂揚名顯親色養怡愉者啓明不兼  
之哉啓明同志諸君子以余知啓明相與

徵余言以爲賀余嘗得交於蜀中賢豪士  
因稔聞王太孺人之賢云太孺人淑哲端  
懿有士行相竹坡翁內理雍肅祇順啓明  
輩五子義方淵穆有歐蘇夫人之風蜀中  
稱罕儷焉夫元化融結渾灝細縕流峙而  
爲高山深川然後出博噐異物以表其能  
雲之積於太虛也彌漫滃鬱渾不可間乃  
沛霖雨以澍濡群彙是知貞本既固則美  
利自生敦體裕如則流澤必潤此大道之  
激而自然之符契也由是言之太孺人之

嘉德與啓明之才賢不可以覽睹哉人親  
生名世之子蓋國膏民則天茂其報而綏  
以祺祥人子光親之訓展采宣力於時則  
召致熙皞而禔祿於身家詩稱屏翰爲憲  
則受福不那蓋自古著之矣今太孺人慈  
惠能教適觀啓明之成乃天壽之格

帝綸之褒秩秩乎申錫於未艾而啓明引揚太  
孺人之休至覬澤蔡人振飭風紀茲復糾  
慝邊圉以相我國家非所謂屏翰而那於  
受福者耶於是諸君子謂余善言天人之

際命書之以遺啓明俾持以歸侑觴云

贈郭景復使江右道閩壽母序

余歲之甲辰從諸文學入禮闈校天下士中  
得閩士二人皆英偉非凡近器其一爲福寧  
郭子景復景復之文章爾雅深厚盡滌時俗  
浮薄之習及觀其爲人則醇茂冲愿不能作  
卑疵穢趨之態盖文與行相孚昭云明年乙  
巳銓部叙甲第差選選授景復爲中書舍人  
景復業官甫三月適

天子新作

太廟告成乃覃恩侍從俾咸獲褒崇

其所生于景復得贈其父如已官封母氏  
爲太孺人焉夫中舍職簪筆染翰日供御螭  
陛宜若一日不可去朝著然今制員爰而務  
簡故例亦得卽命四方景復乃以秋肱將事  
出江右事竣因欲取道歸福寧捧鸞章冠帔  
壽其母孺人於閩江之濱戒行乞贈言於余  
余惟士君子誦習先王修道術行誼策名清  
時乃其分固將以宣奕經綸朗融勛烈殫所  
學以輔翼其主然而一念忱恂之惻未嘗不  
鍾於其親而鼎釜之養綸命之榮卽筮仕初

已惓惓乎其甚棘矣顧其所遭際則人人  
殊遼速得喪幸不幸輒相睽逃此豈可以  
意取力攫必愜其所欲耶若今景復可謂  
竒逢殊逅宦遊所不常獲者矣夫進士非  
高等彙縮郡邑章綬以敷歷畿甸之外而  
其釋褐爲侍臣者僅什之參焉然有卽爲  
侍臣矣必奉職恪共積勤勞三載司勳奏  
最以授於司封乃得詔於上而恩典畀焉  
固未有陳力旬月而能顯躬以昭明其親  
者也然又或卽被恩顯親矣乃官守羈其

躬不暇違父母之養怔忡內顧徒切神往而冠服之華稱觴舞班之樂輒不能以身致之凡若此者雖其愛親聚順之衷不緣是爲豐嗇然仁人孝子之情亦爲勢之乘遇所壅闕矣而景復始服官卽優游清華之選簿書期會不紛其心且得以使事雍容覽觀匡廬彭蠡之勝而封章煌炳光燭梓里母孺人色咲北堂撫令子畫錦之歸以訓栢舟之志福寧父老人士相與登祝榮壽共嘆賞賀母穀子之功可不爲閩南竒盛事哉故余于景復之行旣以人所不

○壽宗叔南江公五秩序

南江爲余宗叔父寔肇郡守濱陽公之仲弟公貌魁梧立肯炯炯視鬚髯鬢如睇望之若蘄峻不可狎然中心閎曠夷達與物無芥蒂對客善言咲亶亶忘倦性又喜飲酒興至輒無紀而未嘗亂夫貌豐其樹滋衷和其瀟邃群物者其機必化適情者其神必全茲四者祺祥之淵澤禔壽之所必

趨焉辛丑以子鉉送事繕部偕予來京師  
壬寅之七月爲公五秩初度鉉獨喜自慶  
曰鉉弗類以織畷北馳不能朝夕親側藉  
令吾父不與兄偕來即茲辰必不獲跼階  
下稱壽觴今幸父遐至得率婦親朝夕饌  
鉉固津津喜辰集于艾又能酌菽水市菓  
蔬子婦並拜小庭中喜更有加焉吾兄雄  
詞賦爲墨卿且誼屬宗子姪乞文之以致  
祝私余唯唯乃詢曰余昔之歲操木蘭之  
舟蕩文杏之楫鳴榔於東海灑滌中頃焉

天風扶搖歛若電馳忽艤於瀛洲之滸余  
乃攝衣而上登丹霞之厓見廣安期之徒  
指道博觀歷覽仙窟贈予天池之鯉扶桑  
之蘭崑崙之桃玄圃之鹿爲余壽可得以  
壽而翁乎鉉曰吾聞神仙事恍洋惝恍漫  
不可考信兄之云或漆園之寓言也鉉不  
能窺其際安所探以壽吾父哉余又曰余  
於正月始和曳惹裾行紫綬從金馬門造  
大官之厨而觀焉則見烹人內饗割鮮解  
脰脚麟膾鳳珍膳竒品不可殫睹記而余

儕編摩石室論思經帷者咸分給以洗滌  
其親若是者可致以事而翁乎曰士君子  
激昂清霄持梁齧肥璀璨鍾鼎之養鉉嘗  
有志焉乃今役役簿書焉敢茲覲哉余聞  
而灑然曰俞哉汝翔於達人之域乎夫神  
仙說眇矣而孝子之承親緣分稱情順道  
不逆倫無忝焉汝雖不振彩賢科然而美  
文詞有適用材他日必爲良有司而翁安  
汝色養好修自崇日進遐齡非道化之符  
而自然之驗耶鉉驪然曰可以爲文矣爰

次爲壽

○壽錢母孺人六袞序

歲庚子維茲兩浙賓興雋彥凡升諸南宮  
吾慈雷川錢子鯨以名詩魁及士燕鹿鳴  
東歸觴舞北堂以稱慶母孺人之六袞雷  
川之執友見心張君謂十洲秦君鏗嘉茲  
殊祉謀裒諸文言以焜燿其盛且爲世之  
人親善穀其子與人子善養其親者立訓  
焉謂某造史職之末于法宜揚美樹觀有  
同袍之雅與雷川子宜寓忱匡孝因諄命

之曰元峯子爾毋以不佞辭煒承命載筆  
曰君子邃中積學神化備矣漱藝擒英文  
章成矣畜通時發以竣陟於巍科而昭光  
其化譽僉曰備茲貴乎其孰能與之哉君  
子之親履道順貞以厚其殖萃蘇歛福以  
葆其營由是孚格承休以嚮用乎玄禔而  
逍遙於無紀僉曰崇茲齒乎其孰能與之  
哉斯二者恒以之顯祝天下之嘏而天下  
之竒楨異數則固未有能融其幾者達人  
觀博尚論匪夷其言曰君子負邁種之才

而勛名揚於王路君子之親隆豫天之德  
而壽祺集于厥躬是則理之常也其或令  
名彰於子而年所畜於其親遐齡昇於親  
而顯庸誦於其子是則常而未始不變也  
若夫壽考裕登而會逢其子之貴經綸方  
奮而適值親壽之升是則妙於常變之交  
而天不愛夫竒且異者以授之也世之罹  
于變者多矣而獲夫未始不變者亦將希  
覩况能協其常乎兄又能進此妙于常變  
之交而掇夫竒且異者乎雷川之遇詢弗

可及也已矣雷川自少以英偉聞厥考某  
及孺人某之教銳情舉子業未弱冠已蜚  
聲塲屋既某君不永孚於年孺人栢舟中  
河痛君子弗觀二孤之成每以勉卒功業  
用酬先志戒雷川及仲子鮪焉雷川率其  
弟周旋罔墜文行蔚卓果以詩魁振先蠱  
而孺人悼夫淑子之惊竟以不實且帝顯  
其靈特嘉殊會俾孺人以茲年屆六秩雷  
川以茲年膺高荐子得以拜未老之親孺  
人得撫佳兒以畢無涯之願是天人相與  
之際可不謂之竒且異哉雖然雷川子達  
矣舉於鄉爲兆爾冠名南省獨對彤庭以  
敷歷於館閣而締飭乎太平其表創之極  
也孺人壽矣秩乎六履端爾優游祿養晉  
越期頤以光被乎鸞封而相忘於絳曆其  
德福之終也雷川繇兆以臻其極孺人申  
端以奠其極則慈孝之倫祿位之造榮壽  
之祐耦協於錢君將天下之爲烈矣豈值  
斯今之賀哉嗟夫使世之爲人子者如雷  
川之能奮於孤孰不可爲肖子使世之爲

人婦者如孺人之能植其子孰不可爲賢  
母故煇于茲壽也既侈其慶而且以立天  
下之觀云

○壽吳母倪太孺人八十序

歲次庚戌今侍御晉庵吳君母倪太孺人  
壽躋八十正月八日維初度辰侍御賜谷  
申君槐亭宿君先期造予謀所以壽太孺  
人者且曰闡發幽潛垂之無窮者子史氏  
之職也予與吳君同舉進士義固當贊其  
喜成其志者其敢以不敏辭蓋予亦嘗聞

太孺人之賢矣自吳君之舉進士也稱說  
古今馳騁百家人服其博揚摧治理必據  
經遠人服其審文辭爾雅不務激詭人服  
其則吳君輒歛衽讓曰此母之成也先君  
子之教也既吳君之推河間也洞悉幽隱  
不惑單辭人服其明請託不行豪右屏息  
人服其斷哀矜無辜妾所全活人服其恕  
吳君復歛衽讓曰此母之命也亦先君子  
之志也今太孺人榮受

天子恩命吳君復晉秩臺端温温如不足日惟

太孺人之訓不少忘詩曰求言配命自求  
多福若太孺人之迂續於天自求多福者  
豈易量哉今夫名川巨浸雖無運動之勞  
然磅礴所積靈秀所鍾蒸而爲重雲沛而  
爲甘雨滋生百穀潤及千里者其蓄厚而  
施遠也今太孺人之德雖不一一外見然  
能成侍御之賢爲天子紀法之臣始授節  
推卽能省刑使畿甸之民首沐

天子好生之德今位益崇施益溥爲官使進善  
良爲生民驅蠱賊陽開陰闔仁義並行使  
天下徧受平康之福孰非太孺人之德哉  
名川巨浸其德翕而能施含而能化有母  
道焉太孺人比德於斯其壽固宜配之無  
彊矣夫速賓友爲春酒以壽太孺人者侍  
御君之情也平法度立民命以壽國脉者  
侍御君之責也章美延休于是焉在予不  
佞敢爲諸君子誦之以附歌頌之末

○葉西隱洎孺人同壽七袞序

西隱葉先生以明年正月十四日爲七袞  
初度配葉母董氏孺人長公一歲則今年

八月二十一日設帨辰也公伉儷同德同  
壽生二子長曰世科邑庠生勵學蜚聲次  
曰世明寄蹟掾史且孫曾繞膝蘭桂森牲  
又同福也孟夏朔旦公次子世明以都吏  
辦事部曹遙望停雲有懷罔極迺繪海水  
松鶴蟠莖圖將請假公府歸而壽其親也  
迺持圖介其叔進士石南君乞余言爲二  
親壽余展圖門之作而嘆曰廣哉備矣子  
之圖也乎浩浩乎汗漫哉海之水乎萬川  
歸之不知何時止而不盈尾閭洩之不知

何時已而不虛者乎其以祝而親之福也  
乎擬乎秀乎童童如蓋哉松之貞乎貫四  
時而不改柯易葉者乎癯乎修乎清迥不  
滓哉鶴之潔乎千年而蒼色千年而玄色  
者乎其以祝而親之壽也乎亦以頌事親  
之德也乎天乎蕢乎蔽芾旋覆哉莖之蟠  
乎生拉度朔之山彌直三千年華三千年  
實者乎其華足娛其實足腴其又以祝而  
親之壽也乎其亦託意仙品奉懽侑觴也  
乎備矣廣哉子之圖也乎君子謂之善頌

善禱可乎雖然子之親醇德願壽偕老稀  
年由今日而進之而耄而耄求求無涯固  
也然吾聞親之壽惟賢子能成之親之福  
惟賢子能聚之親之德亦惟賢子能彰之  
吾因子之圖先以爲子之昆弟祝而後以  
祝而親可乎夫海之水不徒浩浩乎汗漫  
哉爾也蛟龍之所出沒而後其澤普珠玉  
之所潛藏而後其暉潤子之親其海歟子  
之昆弟其將爲蛟龍歟珠玉歟松之貞不  
徒挺乎秀乎童童如蓋哉爾也上有百尺

絲下有千歲苓而后民用前資世廣鶴之  
潔不徒癯乎修乎清迴不滓哉爾也胎化  
鳶鳳群遊郊甸而后物覩快貞符顯子之  
親其松歟鶴歟子之昆弟其將爲絲苓以  
醫國壽民歟爲鳶鳳以表祥昌世歟堯之  
蟠乎不徒天乎黃乎蔽芾旋覆哉爾也溷  
沆瀣之華注日月之精天下之碩果也昔  
王母獻於周庭東方朔竊以自利子之親  
惟供蟠堯娛茲華歟食茲實歟子之昆弟  
其將爲忠爲孝進以獻茲堯於公府而萃

美明堂歟退以奉茲飛於親舍而養志庭  
戶歟無若東方生之自利也若然子之昆  
弟身名借榮光裕之道具矣子之二親壽  
有不益諧福有不為聚德有不益彰者乎  
夫然後子之圖為善頌善禱也石南君在  
余得請教焉子之兄賢豪士也子歸試相  
與諗之其且以余言為奚若

○壽錢孺人六十序

封孺人林氏敬齋錢君之速也孺人相敬  
齋公式穀其子端嚴有軌度二胤子皆獨

立不返以臻於大成豕子越南照舉壬辰  
進士官大理左評屢斷疑獄法用不撓仲  
子奕以甲午升於鄉積學多藝文行將首  
南宮魁天下敬齋偕孺人樂觀厥成嬉嬉  
祿養慈之人僉謂公及孺人善貽後且胥  
羨二胤之章慶譽也維茲己亥孺人屆六  
秩春三月四日為初度辰存紳姻戚徵醴  
稱觴崇詞備物以昭明其榮壽之禔以休  
揚慈孝之光烈是時協氣鬱葱景物熙媚  
天風沸樂白麟貢書醴酒如也賓從有翼

而孺人及公酡顏班髮頽然靜好於其中  
酒暨央越南同年遠齋顧子浮觴而祝焉  
曰怡神吸萃得天地之常求以徵其躬之  
謂壽錫光近天下之焜燿者以邁於種之  
謂榮人孰不欲茲二祐之耦集也而必於  
靈承者若而人孺人貞淑之懿潛孚彼蒼  
用膺六秩式兆壽祺長子服官於朝仲子  
賓興於鄉科甲相輝鸞章煥及冠披璘珣  
鍾鼎璀璨壽而茂濟以榮夫庸得而企諸  
願以此酒爲孺人壽養虛馮子亦浮觴而

頌焉曰夫以道義扶人者是則夫勛德榮  
親者是則子夫若子異獲其婦人之所恃  
以俱造也敬齋學邃行修難乎其麗也而  
孺人爲之配照奕青霄鸞鷲驚天庭羽儀難  
乎其先也而孺人爲之母則是協好逌而  
撫賢胤孺人之心固悠乎其曠如也夫是  
而玄倪翔焉粹道鐘焉以引其年未艾夫  
奚徵願以此酒爲孺人壽既越南同袍元  
峯史某加爵而昌言曰顧子侈榮壽之徽  
音是紀孺人之所受也馮子志配胤之繼

明是遯孺人之成也某又聞之天人之福  
非其能受之爲貴而難於其壽之爲難非  
其能成之難而大於其成之爲難孺人厥  
壽綿綿厥宗煌煌昭天之光迄於無疆其  
受不亦久乎厥配偕期厥子偕蜚植天之  
維鑄於鼎彝其成不亦大乎維久維大孺  
人之嘏其純矣敢不以此爲孺人壽于時  
敬酬無算景雲生色士夫與燕者咸謂顧  
子之祝不溢美馮子之頌不僞詞且謂史  
熯之言非稗狂也乃曰是可以壽孺人壽

矣因識之遂書爲序

○月溪錢翁偕褚夫人雙壽序

雙壽叙者叙達人之並陟壽祺以徵德也  
世人之恒言曰帝天陶鑄乎群生均性而  
殊氣是故稟受有醇醜則遐邇之齡判矣  
調攝有淑慝則修短之歷睽矣曷壽之咸  
享乎曷享之克偕乎君子曰有機焉夫固  
不謂氣也至人之緒餘曰其道澄者其天  
必全語機一也維知機而後可以膺純嘏  
蓋道也者聖人所以含真體元植躬體命

示天下以迓和歛禋之玄樞也是故其粹然澄者壽與偕升溷然滓者壽與偕降維皇監觀顧其道之足以遂媿焉爾殊禎元養固有所勿恤者也雙壽輝英堂室有融不可以幾一之妙者得之乎予嘗持君子之論以博觀乎天下未易以恒覲也而常熟之月溪錢翁及其配褚夫人寔維介茲竒福焉翁諱鮪字雲助蘇之天民也夫人有賢淑行國博適菴公之女弟相與爲德和敬引翼優入壽域嘉靖己亥翁以大簇

月夫人以夷則月並爲七秩初度蓋誕降之庚同昭格之道同故其裕登乎壽考亦同也胤子雲江君某以進士侯吾慈羈於官守怍怍焉以弗獲舞班稱觴爲恨慈之縉紳飲侯之仁思以贊侯之孝於不逮且異翁及夫人不群之壽謀侈諸文以遙致賀私僉謂煒當秉筆煒慈人也雲江君慈之父母也是故迹雲江父母吾慈之德而翁與夫人之德福可稽矣夫民牧教思無窮行愷之政以淑民性是則父道容保無

彊行悌之政以淑民生是則母道今觀雲  
江之子惠吾慈也端嚴簡重納民於軌物  
人知其義而不敢犯民皆有父之尊矣易  
直子諒乎民以徽柔人知其仁而不忍攜  
民皆有母之親矣父母盛德淪浹慈民是  
不可以遯翁與夫人義方之訓乎是不可  
以由訓而得翁與夫人成身若天之幾乎  
我聞翁忱洵坦夷家具協程而怡愉善良  
之行薰炙三吳夫人安貞巽順相內理上  
下有章而樂予好施博婺怙以有植甚衆

其豈弟之德天性則然是故裕諸身則雙  
壽之祉敷錫於天心穀諸子則日新富有  
之勛業始於吾慈以光昭於天下今之秩  
未艾之階爾馳域外之一見者未可執是  
以爲翁及夫人慶也予未及拜翁與夫人  
德容然於雲江有道誼之深爰則所以知  
雲江者不淺故探本書之以寓祝頌之忱  
于萬一云爾

○徐氏家乘文章考序

今少師存齋徐公以嘉靖甲午督學兩浙

煇庠然在諸生中濫竽甄拔蓋以文受知  
於公者也乃茲服膺師訓罔敢廢墜幸復  
以文受知於

聖天子得朝夕公左右時時執所爲文而就正  
焉公一日謂煇曰余家乘中有文章考者  
哀輯名公卿贈述諸作以垂示來裔子盍  
屬文爲序煇奉命唯唯乃披帙而覽觀之  
于去思碑見浹民之澤焉于贈行篇見遇  
主之幾焉于賀考績見經國之猷焉于壽六十  
見禔身之福焉而于沈夫人之銘狀則又

見公齊家之化焉煇作而歎曰颯颯乎美  
哉夫載德勒功匪碑弗永擗微挾盛匪序  
弗彰敷茂揚芬匪詩弗暢而模顯烈闡幽  
光匪紀述弗著凡稗茲編者皆據意章志  
足以識公之大端矣然公之文章一代之  
宗匠也表儀後學藻績

鴻謨片言隻韻流布寰宇莫不以爲握靈珠抱  
荆玉而諸公之文芬詞錯采犁然而陳何  
至見錄于公乃遂登之家乘以貽諸子若  
孫耶蓋公休度冲襟不以已長格物一言

而善即牛角之嚼堂下之語不遺于所聞  
一行而善即筦庫之士饁田之夫不忽于  
所見而况文之義繫于公者有不深嘉而  
樂與之乎雖然公之名天下頌之四夷知  
之固不待文而顯而諸公之文系之世譜  
歲之華閱則寔於公有託焉昔李漢序昌  
黎之集錢公輔記文正之田至于今猶知  
有漢與公輔者豈非得所附以施於後世  
哉煇於是又爲諸公幸也

○賀邑博壽泉徐君膺薦序

嘉靖戊申余捧策使唐藩因取道歸越山  
觀省過武林弭節時同年裴侍御按吾浙  
乃飲余於紫陽洞天既而躋瑞石觀鶴仙  
亭浮觴深語獲聞其藻鑑之精而藩臬郡  
邑之良未遑徧述至於學官博士則余慈  
壽泉徐君褒然爲稱首余欽焉而莫究闕  
君閔奧也已而抵家謁先師於學官壽泉  
君偕僚友具衣冠出肅規度取睦臆登而  
恭引余坐議於移時咸恂恂爾雅庶幾古  
所稱儒林之遺余因傾心君之爲人及觀

庠彥厥文學斌斌蒸滃視疇曩滋益隆余  
凱茲朗融乃質諸縉紳諸先生僉謂君兼  
綜載籍鉤闡淵閎日群高第才生相與砥  
修行業發揮文章曄曄然策期引休明也  
余以是愈賢君而重躋裴侍御之明久之  
侍御巡郡因滿歲當代去法得旌別庶官  
以聞而壽泉徐君以博士高等膺首薦乃  
慈之人士罔不相孚以歡謂君爲名博士  
厥以崇樹駿發宜獲顯褒裴侍御博采妙  
擇觀君之深不沒沒曹輩見可不謂並賢

遠私昵哉以余執史筆不可無贈言於君  
余惟君瑰琦璨瑋刷彩揚芬不日魁南宮  
奉大對蜚英紫薇俾海內快光覩也西臺  
之薦亦繡斧恒典爾於君奚羨隆耶抑余  
聞之非自修之貴而獲知己之難荆山之  
璞固造化所儲珍也使和氏眩明則連城  
之價竟千載不彰矣麒麟駉駉天駟之良  
也邂逅伯樂然後識其爲行空歷塊之材  
故大人子虛之賦藻飾寰宇必得意先容  
於漢廷而長卿之名始連著於天下逸思

凌霄仙才妙絕太白之詩歌空八埏也非  
知章之賞鑑則白之所表見未必卓冠於  
詞宗古今懷珎滴鉅之士不遭遇知已即  
手抉雲漢胸羅日星亦將掩腋凡近矣其  
能翔玉堂躡皇署櫟咸英以擻茂杼華哉  
壽泉徐君雖希世之傑得裴侍御之薦乃  
益流光縉紳曩所稱附青雲而彰其施者  
非此之謂耶君名某字某閩之蒲陽人從  
叔祖某嘗以學博舉進士爲顯官今蓋編  
武云

○送懷葛向公之任蘇州郡博序

懷葛向君爲余同志友少負獨行君子之  
德義不苟合於曹隅性嗜學務博觀古今  
載籍淵邃閎肆即宿學不能教其所不知  
爲文鬱茂爾雅摛情抉辭尤善援傳書外  
家語疊疊數千言立就余覽睹其文未嘗  
不爽然自失焉然而殊珍異璞售於時恒  
不易逝故君年幾強始獲成進士薦紳先  
生相與言曰懷葛君茲舉其澹澹而溢流  
矣俾君服休館閣則摘華振藻潤色鴻業

展采鄉署則熙載凝績裨贊令猷陳力郡  
邑則謳呻樹踏民物救寧取君之所積而  
弘攄之將定勛施聲蜚英騰實於不窮矣  
於君不有厚覬耶是歲秋八月天遷君乃  
以病不任民事太夫人春秋高宜就密邇  
地祿養之䟽具情於 朝乞郡庠博士寔  
蘇州馬余訝而造君曰懷葛子方以奇偉  
屬群望迺今論官不毅然受大邦振所學  
以澍濡蒼生凱澤庶類顧董董焉任郡博  
徒修經藝播功令以陶淑多士是何淺聞

小美俾恩施不丕窵哉君訢然而笑曰子  
是之謂庸非以郡博爲不足行志耶肆今  
聖天子昭至德開大明配天地本人倫勸學修  
禮崇化厲賢以風四方則建太平之原自  
庠序始矧儒術藝文所以闢王路而興英  
傑世之宰相卿大夫輔翼其主禔福中外  
功名俱著於春秋咸自學官弟子躋通貴  
也且子之意又豈不以散秩卑祿非所以  
矜勢能哉夫峻階膺仕今之所謂顯榮也  
名流碩輔並以隆德軼才位厥事而天下

功之吾方幸茲官之靜養得鍾釜祿願親  
足矣吾又何所希覩乎余聞而喟然曰今  
而後知懷葛之足以經世已夫識翔寥廓  
可與忘物累機入靜深可與宰群動古之  
仁人學士其初無徇天下之心而後道始  
弘其裏無利天下之念而後業斯富懷葛  
方筮仕而志慮恬熙則名實純粹爍炳無  
疆而參兩彌綸之烈已豫其植矣昔公孫  
以掌政而至相位兒寬以文學而宅三公  
此皆以積深致然也郡博爲懷葛子之崇  
基非耶若夫經義治事紹休安定即庸輩  
能知君余又何采焉



